

SKI ALPIN: Savognin Pendicularas SA nov sponsour da Sandro Simonet

Investiziun tgi vala bler

G.N.S. Sen la staschung dalla coppa mundiala da skis ò Savognin Pendicularas SA en nov «ambassadeur». Igl skiunz indigen Sandro Simonet fò da nov reclama per las pendicularas digl li noua tg'el ò dimora.

Igl anvien passo ò Sandro Simonet fatg reclama per la firma «Brack.ch», scu oters skiunzs da Swiss Ski er. Damai ò igl spezialist da slalom e commember digl cader naziunal B da Swiss Ski, gia sustign d'en sponsour general scu oters sportists er. Ossa è igl atlet da Casti cun dimora a Savognin ventirevel d'aveir catto cun Savognin Pendicularas SA en sponsour persunal, principal e surtot en sponsour dalla regiun. Chels deis è neida sottascrètga la cunvegna tranter Sandro Simonet e las pendicularas.

Peter Schröcksnadel ed igl ski alpin

Tgi Savognin Pendicularas SA è pront da sustigneir Sandro Simonet saro bagn er en Maret da Peter Schröcksnadel, igl «senior» dalla famiglia. Siva digl 1990 è el president dalla Federaziun da skis austriaca ed è er en om respecto tar la «FIS», la Federaziun interna-

ziunala da skis. Cò ò el er da deir ensatge, percheigl tgi cun chella experientscha canoscha el igl circus da skis scu las sias atgnas cassatgas.

Ena gronda onour


Sandro Simonet dei tgi per el seia ena veira onour da pudeir far reclama per Savognin Pendicularas SA. Cun esser tratg se ainten ena regiun cun ena culissa da schi belas muntognas vegia el anc duple plascheir tgi las pendicularas da Savognin sustignan el. Graztga agl nov sponsour seia el anc pi motivo per las cursas dalla coppa mundiala da skis digl anvien 2020/21, accentuescha Sandro Simonet. El nizegia gugent la caschung da far attent bleras persungas sen la regiun da vacanzas da Savognin. Seia el betg gist ensanous per far cursas, persiva en pèr deis a Savognin geia el gugent aint igl territori da skis tg'el vegia ple u manc davant igl ischtesa. Incanto seia el cunzont dallas pistas largias e lungas, manegia igl skiunz internaziunal. Tant per Christoph Passecker, igl directour administrativ da Savognin Pendicularas SA, scu er per Tanja Amacher, la directoura turistica da Savognin e conturn è la collaboraziun cun Sandro Simonet ena situaziun da «win-win.»



Da nov cun sponsour persunal e schizont indigen: igl skiunz Sandro Simonet cuagl nov cap da Savognin Pendicularas SA.

Belas sommas digls sponsours

Pi bler success tg'en skiunz ò, pi prominent tgi igl atlet è, pi carismatic tgi igl sportist è, duple tgi igls sponsours persunals èn pronts da paer. Chegl ò detg Nicola Caviezel tgi segna tar Swiss Ski pigl marketing. Per skiunzs tgi appartignan agls caders naziunals seian igls sponsours principals spert pronts da paer duple tgi 100 000 francs per la reclama sen caps u tgapitschas. Seia en skiunz commember digl cader naziunal A, B u C, sa drezza la somma igl ple tenor igl status da commembranza da cader. Nicola Caviezel dei tgi sch'en skiunz survigna per exaimpel 50 000 francs per far reclama per en travagl u en product geian anfignen 20% da chella somma agl manager digl sportist. Ensatge da chella somma geia pero er a Swiss Ski. Blers atlets vegian aint igl contract er ena cunvegna tgi per mintga victorgia u mintga plaz da podest paia igl sponsour, supplementar, ena somma da 5000 francs anfignen 10 000 francs. Igl skiunz vegia sa tgapescha er tschertas obligaziuns. Las cursas dastga el far angal cun en casc cun se la reclama digl sponsour e tar intervistas dastga betg mantger igl cap u la tgapitscha cuagl logo digl sponsour. Er tar occurrenz publicas (autograms) seia mintga sportist ubliia da sa mussar cun la reclama digl sponsour persunal.



Igl skiunz Sandro Simonet, flanco da Christoph Passecker (san.), igl directour administrativ e Curdin Baltermia (dretg), igl directour tecnic da Savognin Pendicularas SA.